



TEKS

KHUTBAH

NEGERI PAHANG

MEI 2026



AMANAH NYAWA, TANGGUNGJAWAB IMAN

29 MEI 2026M | 12 ZULHIJAH 1447H

الْحَمْدُ لِلَّهِ الْقَائِلِ:

وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئًا وَجَعَلَ لَكُمُ السَّمْعَ وَالْأَبْصَرَ
وَالْأَفْئِدَةَ لَعَلَّكُمْ تَشْكُرُونَ

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ
وَرَسُولُهُ.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ،

فِيَا عِبَادَ اللَّهِ، اتَّقُوا اللَّهَ وَأَوْصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

Bertakwalah kepada Allah ﷻ dengan sebenar-benar takwa, laksanakan segala perintah-Nya, dan tinggalkan segala larangan-Nya. Mudah-mudahan kita diberkati Allah ﷻ di dunia dan akhirat.

Sidang Jumaat yang dirahmati Allah ﷻ,

Sesungguhnya Islam adalah agama yang amat mementingkan keselamatan nyawa manusia, di mana dalam Maqasid Syariah, pemeliharaan nyawa (hifzunnafs) merupakan antara objektif utama syarak selain daripada pemeliharaan agama, maruah, akal dan harta.



Justeru, kewujudan undang-undang jalan raya serta agensi penguatkuasaan seperti Jabatan Pengangkutan Jalan, Polis dan penguatkuasa yang lain bukanlah bertujuan untuk menyusahkan rakyat, sebaliknya ia merupakan satu bentuk siyasah syar'iyah, iaitu kepentingan pengurusan masyarakat berteraskan syarak, demi menjaga kemaslahatan dan keselamatan umum. Firman Allah dalam surah Al-Baqarah ayat 195:

أَعُوذُ بِاللَّهِ مِنَ الشَّيْطَانِ الرَّجِيمِ

وَأَنْفِقُوا فِي سَبِيلِ اللَّهِ وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا إِنَّ اللَّهَ يُحِبُّ الْمُحْسِنِينَ ﴿١٩٥﴾

Yang bermaksud: *“Dan belanjalah (harta benda kamu) di jalan Allah (untuk menegakkan agama Allah) dan janganlah kamu mencampakkan diri kamu sendiri ke dalam kebinasaan, dan berbuat baiklah kerana Allah mengasihi orang yang berbuat baik.”*

Ayat ini jelas melarang kita melakukan perbuatan yang boleh memudaratkan diri sendiri dan orang lain. Dalam konteks jalan raya, memandu melebihi had laju, melanggar lampu isyarat, tidak memakai tali pinggang keledar, atau memandu tanpa lesen yang sah adalah perbuatan yang mendekatkan diri kepada kebinasaan.

Statistik Polis Diraja Malaysia (PDRM) menunjukkan sebanyak 6,537 kematian telah dicatatkan pada tahun 2025 daripada lebih setengah juta kemalangan yang berlaku.

Selain membahayakan nyawa dan hak orang lain, kesalahan-kesalahan jalan raya ini turut membawa kerugian besar kepada negara. Berdasarkan statistik kematian dan kecederaan parah dilaporkan Polis Diraja Malaysia (PDRM) dalam laporan perangkaan kemalangan jalan raya dan Program Penilaian Jalan Raya Antarabangsa (iRAP), negara dianggarkan mengalami jumlah kerugian hampir



RM18 bilion pada 2010, iaitu bersamaan 2.2% daripada Keluaran Dalam Negara Kasar (KDNK), dan jumlah ini meningkat kepada lebih RM25 bilion pada 2023 akibat kos rawatan kemalangan, kehilangan produktiviti, serta kerosakan harta benda.

Oleh itu, mematuhi undang-undang jalan raya bukan sahaja menepati prinsip Maqasid Syariah tetapi juga menyumbang kepada kesejahteraan masyarakat dan kemakmuran negara.

Sidang jemaah yang dimulihkan,

Islam adalah agama yang amat mementingkan soal keselamatan. Allah menurunkan syariat bukan untuk menyusahkan manusia, tetapi untuk memelihara kehidupan.

Apabila kerajaan menetapkan peraturan kenderaan dan tatacara pemanduan, tujuannya adalah demi ketertiban dan keselamatan. Mematuhinya dengan niat menjaga keselamatan diri serta orang lain akan dicatat sebagai satu amal soleh dan ketaatan kepada Allah ﷻ. Firman Allah dalam surah An-Nisa ayat 59 yang bermaksud:

"Wahai orang yang beriman, taatlah kamu kepada Allah dan taatlah kamu kepada Rasulullah dan kepada Ulil-Amri (orang yang berkuasa) dari kalangan kamu."

Dalam memastikan keselamatan pemanduan, para pemandu perlu memberikan perhatian serius terhadap tiga aspek ini:



Pertama, persiapan diri: iaitu kesiapsiagaan semasa memandu, pematuhan kepada semua peraturan jalan raya dan sikap positif dalam perjalanan.

Kedua, penyelenggaraan kenderaan: iaitu kenderaan yang menepati segala peraturan teknikal, dalam memastikan keselamatan dan keselesaan dalam perjalanan; dan

Ketiga, dokumen lengkap: iaitu mempunyai lesen, perlindungan takaful, cukai jalan dan permit berkaitan.

Sidang Jumaat yang dirahmati Allah,

Dalam kerangka Maqasid Syariah, nyawa bukan milik mutlak kita, sebaliknya merupakan satu amanah daripada Allah yang wajib dipelihara. Justeru, setiap undang-undang jalan raya yang digubal seperti penetapan had laju, kewajipan pemakaian topi keledar dan tali pinggang keselamatan; serta larangan melanggar lampu isyarat merah, memotong barisan, memotong di garisan berkembar, memandu di lorong kecemasan dan menggunakan telefon bimbit ketika memandu; semuanya selari dengan maqasid ini dan bukan sekadar peraturan pentadbiran. Bahkan, ia merupakan instrumen syarak untuk mencegah kemudaran.

Kaedah fiqh menyebut:

دَرْءُ الْمَفَاسِدِ مُقَدَّمٌ عَلَى جَلْبِ الْمَصَالِحِ



iaitu menolak kemudaratan didahulukan daripada mengambil manfaat. Jika pemanduan laju hanya memberikan kepuasan sementara tetapi berisiko meragut nyawa, maka Islam mendahulukan pencegahan mudarat tersebut.

Sidang jemaah sekalian,

Seorang muslim sejati bukan hanya dikenali melalui solat dan ibadahnya, tetapi melalui akhlaknya dalam kehidupan bermasyarakat, dan pematuhan terhadap undang-undang jalan raya merupakan cerminan disiplin, tanggungjawab serta ihsan terhadap diri dan orang lain.

Hal ini selari dengan sabda Rasulullah ﷺ dalam hadis riwayat Ibn Majah yang bermaksud:

“Tidak boleh melakukan perbuatan yang memudaratkan diri sendiri dan tidak boleh memudaratkan orang lain.”

Sidang jemaah yang dimuliakan Allah,

Sebagai penutup khutbah pada hari ini, marilah kita memperbaharui adab kita di jalan raya dengan memulakan perjalanan dengan doa agar diberkati, mengamalkan sikap bertolak ansur dan kesabaran supaya emosi tidak menguasai diri hingga mencetuskan pergaduhan atau pembulian jalan raya, serta memastikan kenderaan berada dalam keadaan selamat sebagai sebahagian daripada ikhtiar sebelum kita bertawakal kepada Allah ﷻ.



أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا أَصْبِرُوا وَصَابِرُوا وَرَابِطُوا وَاتَّقُوا اللَّهَ لَعَلَّكُمْ

تُفْلِحُونَ ﴿٢٠﴾

بَارَكَ اللَّهُ لِي وَلَكُمْ فِي الْقُرْءَانِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ
الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ
الْغَفُورُ الرَّحِيمُ.